

Morning Dogri (NSD) National News Bulletin 05-04-2025

आकाशवाणी

1. प्रधानमंत्री नरेन्द्र मोदी अज्ज कोलम्बो च श्रीलंका दे राष्ट्रपति अनुरा कुमारा दिसानायके हुंदे कन्नै दपक्खी गल्लबात करडन।
2. गृहमंत्री अमित शाह अज्ज छत्तीसगढ़ दे रायपुर च नक्सल-रोधी अभियानें दी समीक्षा करडन।
3. राष्ट्रपति द्रौपदी मुर्मु होरें इमिग्रेशन ते विदेशी नागरिकें सरबंधी विधेयक-2025 गी मंजूरी देई दित्ती ऐ।
4. अमरीकी आयात उपर 34 प्रतिशत टैरिफ लाने दी चीन दी जवाबी कार्रवाई करी अमरीकी शेयर बजारें च बड़्डी गिरावट दर्ज कीती गई ऐ।
5. भारत दी सिफ्ट कौर सामरा होरें अर्जेंटिना च विश्व कप निशानेबाजी प्रतियोगिता च महिलाएं दे 50 मीटर राइफल-थ्री पोजिशन मुकाबले च सुन्ने दा तगमा हासल कीता ऐ।

<><><><><><><>

PM Srilanka Visit

प्रधानमंत्री नरेन्द्र मोदी अज्ज कोलम्बो च श्रीलंका दे राष्ट्रपति अनुरा कुमारा दिसानायके हुंदे कन्नै व्यापक गल्लबात करडन। अज्जै दी इस गल्लबात राहें दौनें देशें बश्कार खासतौर उपर ऊर्जा, बपार, सम्पर्क, डिजिटीकरण ते रक्षा दे खेत्तरें च सरबन्ध मजबूत होडन। श्री मोदी श्रीलंका दी त्रै दिनें दी जात्तरा पर कल संज्ञां कोलम्बो पुज्जे। श्री मोदी हुंदा कोलम्बो पुज्जने पर निग्गा सोआगत कीता गेआ। ब्हाई अड्डे पर राष्ट्रपति दिसानायके हुंदे मंत्रिमंडल दे शीर्ष मंत्री मजूद हे। पिच्छले ब'रे सितम्बर म्हीने राष्ट्रपति दिसानायके हुंदे आसेआ कार्यभार ग्रैहण करने परैन्त श्रीलंका दी यात्रा करने आहले श्री मोदी होर पैहले विदेशी शासन-अध्यक्ष न। प्रधानमंत्री मोदी थाईलैंड दी द'ऊं दिनें दी जात्तरा दे बाद श्रीलंका पुज्जे न। उ'नें बैंकॉक च बिम्सटेक शिखर सम्मेलन च हिस्सा लैता।

<><><><><><><>

HM Chattisgarh

गृहमंत्री अमित शाह अज्ज छत्तीसगढ़ दे बस्तर डिवीजन च दंतेवाड़ा जिले च जनजाती परंपराएं ते संस्कृति दे महोत्सव 'बस्तर पंडुम' दे समापन समारोह च हिस्सा लैडन। श्री शाह होर 2 दिनें दी छत्तीसगढ़ यात्रा पर कल संज्ञां रायपुर पुज्जे हे। स्हाड़े संवाददाता नै दस्सेआ ऐ जे गृहमंत्री होर रायपुर च नक्सल-रोधी अभियानें दी समीक्षा बी करडन। गृह मंत्री होर अज्ज 'बस्तर पंडुम' यानि बस्तर उत्सव दे समापन समारोह च हिस्सा लैडन जेह्दा आयोजन बस्तर दी समृद्ध जनजातीय कला ते संस्कृति च नमें सिरैया जान भरने ते इसी देश-विदेश अगो पेश करने दे मकसद कन्नै कीता जा'रदा ऐ। त्र'ऊं दिनें दे इस कार्यक्रम दरान जनजातीय नाच, लोक गीत, जनजातीय नाटक, संगीत उपकरणें, लाब्बें, गैहनें, दस्तकारिएं ते व्यंजनें दे खेत्तरें च मुकाबले करोआए गे। जंदी 3 अप्रैल थमां शुरु होए दे डिवीजनल सतह दे एह मुकाबले अज्ज संपन्न होडन। गृह मंत्री होर दंतेवाड़ा च मां धनतेश्वरी हुंदे मंदरै च मत्था टेकडन ते छत्तसगढ़ च नक्सल-रोधी अभियानें दी समीक्षा करडन।

<><><><><><>

Prez Immigration

राष्ट्रपति द्रौपदी मुर्मु होरें इमिग्रेशन ते विदेशी नागरिकें सरबंधी विधेयक-2025 गी मंजूरी देई दित्ती ऐ। विधेयक च भारत च विदेशी नागरिकें दे इमिग्रेशन, प्रवेश ते ठैहरने गी विनियमित करने दा प्रावधान ऐ। एह विधेयक, पासपोर्ट अधिनियम-1920, विदेशी पंजीकरण अधिनियम-1939, विदेशी अधिनियम-1946 ते इमिग्रेशन अधिनियम-2000 द थाहरै पर आहन्नेआ गेआ ऐ। इस विधेयक दा उद्देश्य इमिग्रेशन सरबंधी कनूनें गी आधुनिक बनाना ऐ। इ'दे च पासपोर्ट, यात्रा दस्तावेजें, वीजा ते पंजीकरण दे सरबंधै च केंद्र सरकार गी किश अख्तियार देने दा बी प्रावधान ऐ। इस सरबंधै च बड़े मते कानूनें दे गुंजल थमां बचने लेई गै एह इक कानून बनाया गेआ ऐ। एह्दे मूजब, भारत च प्रवेश, रौहने ते बाहर जाने लेई जाली पासपोर्ट यां वीजा दा इस्तेमाल करने पर 7 ब'रें तगर दी कैद ते 10 लक्ख रपे तगर दे जुर्माने दा प्रावधान ऐ। कानून च होटलें, युनिवर्सिटिएं, होरनें शैक्षणिक संस्थानें, अस्पतालें ते नर्सिंग होम्स गी विदेशियें दे बारै च जानकारी देने गी बी लाजमी कीता गेआ ऐ। सभ्मनें अंतरराष्ट्री एयरलाइनें ते जहाजें गी भारत च कुसै बंदरगाह यां थाहरै पर नागरिक प्राधिकरण यां इमिग्रेशन अधिकारी गी यात्री ते चालक दल दी सूची, जहाज यां आओजाई दे होरनें साधनें बारै अगेत्री जानकारी देना बी लाजमी होग।

<><><><><><>श

Vaishav-T.N. Visit

केन्द्रीय रेल मंत्री अश्विनी वैष्णव होर अज्जै थमां तमिलनाडू दे 2 दिन दे दौरे पर जा'रदे न। श्री वैष्णव होर रामेश्वरम जाइयै नमें बनाए गेदे पाम्बन रेल पुल दे उद्घाटन दी मुकदी तैआरिएं दी समीक्षा करगंन। पाम्बन रेल पुल भारत दा पैह्ला वर्टिकल लिफ्ट समुंद्री पुल ऐ। जेह्दा उद्घाटन प्रधानमंत्री नरेन्द्र मोदी होर कल करगंन।

<><><><><><>श

Goyal-Startup Mahakumbh

केन्द्रीय बपार ते उद्योग मंत्री पीयूष गोयल होरें आखेआ जे नवाचार ते प्रौद्योगिकी पर आधारित विकास च भारत विश्व स्तर पर अगेतरा देश बनियै उभरने गी तैआर ऐ। भारत मंडपम नमीं दिल्ली च स्टार्टअप महाकुंभ दे दुए आयोजन च बोलदे होई केन्द्रीय मंत्री होरें आखेआ जे साढ़ा देश नवाचार जगत च महत्वपूर्ण उपलब्धिएं हासल करा'रदा ऐ ते तौले गै विश्व स्तर पर मजबूत पंछान बनाग। उनें स्टार्टअप महाकुंभ आयोजन दी सराहना कीती ते आखेआ जे एह्दे च अंतर्राष्ट्रीय स्तर दे उत्पादें ते प्रौद्योगिकिएं गी दर्शाया गेदा ऐ। स्टार्टअप महाकुंभ च 3 जहार शा मते स्टार्टअप्स हिस्सा लै'रदे न ते इक जहार कोला बद्ध निवेशक ते इंक्यूबेटर ते 50 देशें थमां 10 जहार दे कोल डेलीगेशन्स शामिल होए दे न।

<><><><><><>

US Stock Market

अमरीका दे राष्ट्रपति डोनाल्ड ट्रंप हुंदे आसेआ बक्ख-बक्ख मुल्खें पर ट्रैरिफ शुल्क बघाए जाने दे बाद वैश्विक बजारै च लगातार हलचल मची दी ऐ। केई मुल्खें एह्दे पर जवाबी कार्रवाई कीती ऐ। कल चीन नै अमरीका पर जवाबी कार्रवाई कीती, जेह्दे परैन्त अमरीकी शेयर बाज़ार च बड्डे पैमाने पर गिरावट होई। निवेशकें गी शैका ऐ जे टैरिफ युद्ध बघने दी सूरतै च अमरीका ते वैश्विक अर्थबवस्थां मंदी च डुब्बी सकदि'आं न। अमरीकी शेयर बजार डाउ जोन्स च 2 जहार 200 अंकें यानी 5 इशारिया 5 प्रतिशत दी गिरावट दर्ज कीती गई। एस-एंड-पी च बी 5 इशारिया 9-7 प्रतिशत दी कमी आई। नैस्डैक कंपोजिट च 5 इशारिया 8-9 प्रतिशत इी कमी दर्ज कीती गई। ब'रे 2022 दे बाद नैस्डैक पैहली बारी बड्डी गिरावट च बंद होआ ऐ। जेपी मॉर्गन दे विश्लेषकें मूजब, अमरीका दी अर्थबवस्था ते व्यापक विश्व अर्थबवस्था दौनें च इस ब'रे 60 प्रतिशत मंदी दे असार न। विश्लेषकें दा आखना ऐ जेकर होर दुए देश बी अमरीका दे खलाफ परते आहली कार्रवाई करदे न तां मंदी दी शैका होर बधी जाह्ग। चीन ने कल अमरीका थमां आयात कीती जाने आहले सब्बमें चीजें-बस्ते पर 34

प्रतिशत शुल्क लाने दी घोषणा कीती, जेहड़ा बपार युद्ध च सम्मनें शा बड़डा बाददा ऐ। चीन नै किश दुर्लभ खनिज वस्तुएं दे निर्यात पर नियंत्रण दी बी घोषणा कीती ते विश्व बपार संगठन च शकैत बी दर्ज करोआई। कनाडा थमां लेइयै चीन नै बधदे बपार युद्ध च जवाबी कार्रवाई दी तैयारी करी लैती दी ऐ।

<><><><><><>श

ISSF World Cup

अर्जेंटिना दे ब्यूनस ऑयर्स च विश्व कप निशानेबाजी प्रतियोगिता च महिलाएं दे 50 मीटर राइफल-श्री पोजिशन मुकाबले च भारत दी सिफ्त कौर सामरा होरें सुन्ने दा तगमा हासल कीता ऐ। 23एं ब'रें दी सिफ्ट होरें 458 इशारिया 6 अंक हासल करियै विश्व कप च अपना पैह्ला सुन्ने दा तगमा जित्तेआ। जर्मनी दी अनिता मनगोल्ड होरें'गी चांदी दा तगमा ते कजाकिस्तान दी अरिना अल्लुकोवा गी कैह दा तगमा हासल होआ। मर्दे दे इस्सै मुकाबले च एशियाई खेड़ें दे पदक विजेता भारत दे चैन सिंह होरें 443 इशारिया 7 अंक लेइयै कैह दा तगमा अपने नांऽ कीता। त्रै बारी दे ओलिम्पियन हंगरी दे इस्तावन पेनी नै 461 अंके दे कन्नै सुन्ने दा ते चीन दे तियांग जियामिंग होरें 458 इशारिया 8 अंके दे कन्नै चांदी दा तगमा हासल कीता।

<><><><><><>

IPL

आईपीएल टी-20 क्रिकेट च मेजबान लखनऊ सुपर जायंट्स नै मुंबई इंडियन्स गी हराई दित्ता ऐ। एकाना क्रिकेट स्टेडियम च कल रातीं खेड़डे गेदे मैच च लखनऊ दी टीम नै 12 रंजें कन्नै जित्त हासल कीती। उन्ने पैहले बल्लेबाजी करदे होई 8 विकेटें दे नुक्सान पर 203 रंज बनाए जेहदे परते च मुंबई इंडियन्स दी टीम 20एं ओवरें च 5 विकेटें पर 191 रंज गै बनाई सकी। लखनऊ सुपर जायंट्स दे मिशल मार्श नै 31 गेदें पर 60 रंज बनाए ते एडम माक्रम नै 38 गेदें पर 53 रंज बनाए। मुंबई इंडियन दे कप्तान हार्दिक पांडयानै 5 विकेटां लैतियां न ते सुर्य कुमार यादव नै 43 गेदें पर 67 रंज बनाए। दिग्वेश गी प्लेयर ऑफ द मैच घोषित कीता गेआ। अज्ज चेन्नई सुपर किंग्स दा मकाबला दिल्ली कैपिटल्स कन्नै साढ़े 3 बजे चेन्नई च होग ते राजस्थान रॉयल्स दा मैच पंजाब किंग्स कन्नै रांती साढ़े 7 बजे चंडीगढ़ च खेड़डेआ जाग।

<><><><><><>

Weather

भारतीय मौसम विभाग नै अगले 4—5 दिनें देश दे पूर्वोत्तर च गर्मी दी लैहर चलने दा अनुमान लाया ऐ। जेहड़र दिल्ली, हरियाणा, राजस्थान, पच्छिम उत्तर प्रदेश, पंजाब ते गुजरात च इस म्हीने दी 9 तरीक तगर चलोग। हिमाचल प्रदेश दे किश हिस्से च बी 2 दिन गर्मी पौग। तोआई गुजरात च 10 तरीक तगर ते कोंकन दे इलाकें ते गोवा च 9 तरीक तगर मौसम गर्म ते उसम आला रौहने दा अनुमान ऐ।

<><><><><><>